



QUÆSTIO MEDICA,  
QUODLIBETARIIS DISPUTATIONIBUS  
MANE DISCUTIENDA

IN SCHOLIS MEDICORUM,

Die Jovis <sup>22<sup>a</sup></sup> ~~decimâ~~ <sup>quintâ</sup> Novembris 1708.

M. JOANNE CLAUDIO ADRIANO  
HELVETIUS,  
DOCTORE MEDICO,  
PRÆSIDE.

*An quilibet humor, ope sibi congeneris succi fecernitur?*

I.



UNCTIONUM integritas in secretionibus posita est; his nulla pars corporis non vacat. Aliæ partes humorem inutilem à sanguine segregant, foras amandandum; aliæ succum functioni cui-dam perficiendæ destinatum separant; omnes sibi proprium fecernunt alimentum. Secretionum instrumenta sunt glandulæ; hæ suis vasis donantur, arteriâ nempe, venâ, nervo, & uno vel altero ductu secretorio. Glandularum structura vix alibi perfectius dignoscitur, quàm in Suis hepate. Venâ cavâ, portâve illius animalis, immisso flatu distentâ, hepar majorem in molem attollitur, & magis conspicuæ fiunt glandulæ externis positæ. Palam fit, eas nihil aliud esse quàm vesiculas membranaceas inter se consimiles, & miro ordine

confitas. Dissecto hepatis lobo, in conspectum veniunt interiores glandulæ, sibi invicem incumbentes, externisque persimiles. Facili negotio aliæ ab aliis se junguntur. Pleræque frumenti granum æquant. Ductum ramulorum venæ portæ, cavæ, & nervi hepatici ad vesiculas usque, non ægrè persequetur sector peritus. In cæteris partibus eandem planè esse glandularum structuram, proum est conijcere. In illis tanquam diverticulis, sanguis per arteriam advectus cunctatur aliquantisper, antequam à venâ resorbeat. Eo appellente distenduntur vesiculæ, earum pori dehiscunt, adeoque ultra tonum extensæ fibræ, tam quæ vesicularum propriæ sunt, quàm aliæ tendinosæ & carneæ, quibus vesiculæ intertextuntur, vi quâ pollent elasticâ resiliunt, humoremque à sanguine secernendum expellunt.

## I I.

**S**ANGUIS non unus simplexque liquor est, sed ex pluribus generis diversi succis conflata moles. Eos efficit & ad secretionem disponit indefinens sanguinis ipsiusmet fermentatio. Adeorum evolutionem absolvendam varia in variis glandulis fermenta incassum comminiscuntur nonnulli. Tantillum enim illud fermentum quod in singulis inesset, præterlabente jugiter elueretur humore. Nec semel eluti jacturam sanguis refarciret: quo namque pacto novum à sinu suo funderet? an aliarum glandularum interjectu? ergo desideraretur alterius cujusdam fermenti opera, & sic in infinitum. Hæc longè aliter se habere declarat experientia, epotis medicatis aquis ingens urinæ copia tam citò emittitur, ut fidem superet tantam colluviem esse fermenti opus. Urina igitur in sanguine existit, eique permixta communi cuircuritionis motu abripitur. Quæ illam cient medicamenta, siue acria sint, siue acida, id minime præstant quatenus majorem fictitii istius fermenti proventum faciunt: sed acria quidem, diviso, attenuato, & rite fermentato sanguine, copiosorem lotii generationem & secretionem promovent: acida vero sanguinis systasim aliquatenus cogendo, efficiunt ut accedentes ad se invicem sulphureæ particulæ urinam utpotè fluidiorem exprimant. Luculenter patebit urinam in sanguine reverâ contineri, si canis vivi arteriæ emulgentes utrinque vinculo constringantur, elapsis enim quatuor vel quinque horis, animal quod jejenum supponitur, evomit copiam feri, odore & sapore urinam referentis. Bilem quoque in sanguine existere vel inde colligere licet, quod obstructis in hepate glandulis, biliosus humor in sanguinem regurgitet, liquores salivam imprimis, universumque corporis habitum inficiat. Verùm licet reliquos humores in sanguine pariter existere non ita certis argumentis ostendi queat; id tamen suadent, tùm quæ glandularum obstructionem consequuntur symptomata, tùm naturæ in edendis operibus mira simplicitas. Cùm igitur urina & bilis in sanguine prius contentæ, per glandulas renum & hepatis percolentur, quid vetat, quominus cæteri humores, quos etiam glandulæ secernunt, in sanguine censeantur antea extitisse, & solâ percolatione absque ullius fermenti interventu foras amandari?

## I I I.

**S**ANGUINEM ab arteriâ glandulis affusum, antequam subeat venam, humorem emittere in ductum secretorium, nemo ambigit. Quo autem pacto fiat ut solus liquor excernendus permeet, non verò quilibet alius in sanguine contentus, aut ipsemet sanguis, non consentiunt inter se Medici. Cùm oculis nequeant, id conjecturâ nituntur assequi. Non pauci contendunt meatum, per quem à glandulâ in vas excretorium transitus est, circulari figurâ præditum esse,

eâque diametro quæ magnitudini particularum humoris excernendi respondeat. Poros supponunt ampliores, ubi succus crassior; angustiores, ubi succus tenuior; sed quid obstat quominus succus ille tenuior poros majores pervadat, vix ac ne vix quidem explicant. Quod enim aiunt, particulas ex quibus conflantur pro majore vel minore mole, alias aliis impetu fortiore vel debiliore cieri, sicque vasorum poros impulsu partium majuscularum dilatari, ut aditus ipsis pateat, qui denegatur tenuioribus minore motûs quantitate donatis; id nullatenus nodum solvit; non enim tantâ foraminis amplificatione opus est, ut tennes pertranseant; cùmque motûs quantitatem habeant moli suæ proportionatam, ipsis quoque vis erit non impar, ad pori dilatationem suæ magnitudini accommodatam. Sunt qui dictis poris præter diversam magnitudinem varias quoque configurationes tribuant, humoris excernendi particulis respondentes. Ne hi quidem facilius rem expediunt: ut enim particula quævis, quæ non rotunda sit, porum suæ figuræ accommodatum subeat, eam appellere oportet certo & determinato situ, qui unicuique est: cum sexcentæ sint positiones diversæ, quibus ab aditu arcebitur. Hæc ergo ratio secretioni perficiendæ inepta est: cùm præterea quæcumque figuram affingant poris amplioribus, transeundi copiam facient cunctis sanguinis partibus, quarum maxima diameter non erit major minimâ pororum diametro. Alii rationem multò convenientiorem excogitavere. Asserunt porum, quo glandula in ductum secretorium pervia est, humore à primordiis imbui, congeneris sibi succi secretionem promovente.

## I V.

**P**ERCOLATIONES cribris vulgaribus in officinis institutæ, quasi manu nos ducunt ad detegendas quæ in viventibus perficiuntur arcanas secretiones. Charta emporetica oleo primum imbuta, oleosos liquores faciliè transmittit, aquosos verò respuit. Ea tamen non minùs ex se idonea est ad aquæ, quàm ad olei percolationem. Etenim si aquâ priùs madefacta fuisset, aquosis liquoribus liberum præberet transitum, oleosis verò negaret. Id ex eo evenit, quod diverso pororum situ gaudeant aquosæ, & oleosæ liquorum particule; unde fit ut materia ætherea è poris illarum egressa vel meatus olei non offendant, sed solidas ejus particulas, vel si poros subeat, eâdem motûs directione nequeat percurrere pororum olei seriem, à tramite pororum aquæ descendentem. Hinc materia ætherea particulas olei sic repellit & amovet, ut hæc meatus chartæ non possint permeare. Eâdem prorsus ratione urina, bilis, saliva, succus pancreaticus &c. non transmittuntur, nisi per incernicula congenere succo imbuta; cum diversâ gaudeant particularum texturâ, diversisque meatuum ordinibus. Neque nos gratis assere putes cola succo, cui secernendo dicata sunt, à primâ origine fuisse delibuta. Nam in cujuscumque Fœtus cadavere secto, colorum cavitates observantur humore prægnantes; quod factum oportuit, ne collapsi eorum parietes sibi invicem accrescerent. Humorem autem illum colis insitum succo, quem trahere debent, congenerem esse ratio suadet; eo enim sic posito absolvetur debita secretio, quam vix credibile est posse aliter institui. Materia enim ætherea, ex humore in poris glandularum nidulante erumpens, sanguinemque illuc affluentem ingressa, particulis occurrit diversi generis, per quarum poros eâdem motûs directione ferri non potest. Eas ergò repellit, donec aliæ accedant ejusdem pororum seriei, ac illæ partes ex quibus emanat. Tunc istæ particule faciliè jun-

güntur cum particulis replentibus poros<sup>4</sup> glandularum, atque harum elatere in ductum secretorium pelluntur, novis ejusdem naturæ semper à tergo appellentibus.

V.

**E**XQUISITAM in operibus suis simplicitatem affectat Natura. Frustrâ eorum rationem investigat qui per ambages hanc detegere satagit. Quò plura supponit, eò longiùs à scopo aberrat. Ea, cùm in omnibus Naturæ effectibus rimandis, tenenda via est, tùm præcipuè in scrutandâ animali æconomiâ, quæ orbis universi miracula in se complectitur. Hæc tota ferè eò tendit, ut idonea partibus alendis functionibusque fovendis sufficiatur materies. Ideo assumptorum alimentorum partes inutiles ab utilibus secerni necesse fuit. Fermentatione tam in primis viis, quàm in vasis sanguineis excitatâ perficitur hæc partium evolutio. In intestinis partes alimentorum tenuiores pervadunt vasorum lacteorum ostiola, remanentibus crassioribus, quæ ab ingressu præ magnitudine prohibentur; ad eum nempe modum, quo in cribris vulgaribus partes fluidæ separantur à spissioribus. Non ita se res habet in secretionibus humorum qui sanguinis molem constituunt. Nulli sive tenues sive crassi transmittuntur ob congruentem sibi incerniculorum magnitudinem; etenim ab illorum omnium colis tenuissimæ sanguinis particule arceri debent; quod ratione simplicissimâ perfici, Naturæ consentaneum est. Quorum igitur commentitiæ variarum configurationum ambages? Cui bono excogitata in poris tanta diametrorum diversitas, secretionibus perficiendis inepta? Quid opus peculiaria singulis partium colis fermenta affigere, cùm simpliciorem secretionis modum vulgares percolationes sensibus subjiciant. Pori chartæ oleo pleni oleum admittunt, repulsis quibuscumque aliis fluidis; quidni vasa secretoria glandularum aliquo humore imbuta, succum huic affinem recipiant, ceteros vero amoveant? Certum enim est ductus secretorios humore, quem assiduè percolant, esse prægnantes. Quoniam verò statim à primordiis aliquo humore repleti oportuit, ne coalescerent eorum latera, verisimillimum est isto succo potius, quàm alio imbuta fuisse. Sanguis ergò per arterias appellens glandulas distendit, porosque secretorios dilatat, dein elatere fibrarum comprimitur pelliturque, humor congener subit porum secretorium, ceteræ sanguinis partes venam ingrediuntur, sicque perficitur tam utile secretionum opus.

*Ergò quilibet humor, ope sibi congeneris succi secernitur.*

Domini Doctores disputaturi,

M. Ludovicus Guillot.

M. Philippus Fontaine.

M. Nicolaus B. de la Carliere,  
Medicus Regis ordinarius.

M. Joannes-Baptista Fermilhuus.

M. Antonius Pepin.

M. Joannes-Baptista Doye.

M. Joannes Dipiney Peschard.

M. Petrus Azevedo.

M. Urbanus Lenoir.

Proponebat Parisiis **ÆGIDIUS ADAM** Constantiensis,  
Baccalaureus Medicus. A. R. S. H. 1708.

---

Typis Viduæ Francisci Muguet, Regis & Facult. Medecinae Typographi.